

四庫全書

經部



欽定四庫全書

讀禮通考卷一百十七 刑部尚書徐乾學撰

二氏禮

僧道制服

唐制玄宗開元二年勅道士女冠僧尼不拜二親是為子而忘其生傲親而徇於末自今以後並聽拜父母其有喪紀輕重及尊屬禮數一準常儀

見金史

乾學案二氏之徒自以出家離俗竟不為親



屬制服彼其本教固然也今乃使之行服雖  
非二氏之本教其於敦厚人倫化導異類固  
甚盛心也第不知唐之世曾以此條載之於  
律否觀玄宗特頒此詔則律文之不載可知  
矣至明之定律遂以此條入之豈不尤為度  
越前王哉有司教之責者弗徒以虛文視之  
而違者一繩以法庶幾扶翼世教之一端云  
舊唐書釋教寂終于都城興唐寺時都城士庶曾謁者



皆制弟子之服有制賜號為大照禪師及葬河南戶裴寬及其妻子並衰麻列于門徒之次士庶傾城哭送閭里為之空焉

宋史禮志仁宗天聖七年興化軍進士陳可言臣昨與本軍進士黃價同保臣預解送之後本軍言黃價昨赴舉時有叔為僧喪服未滿臣例當駁放竊思出家制服禮律俱無明文況僧犯大罪並無緣坐犯事還俗準敕不得均分父母田園又釋門儀式見父母不拜居父母



喪不經死則法門弟子為之制服其於本族並無服式  
望下禮官詳議許其赴試太常禮院言檢會敕文期周  
尊長服不得取應又禮為叔父齊衰期外繼者降服大  
功九月其黃價為叔僧合比外繼降服大功

萬斯同曰禮官之議以出家者比之外繼降服一等  
不過謂期服降而大功黃價可準其應試陳可得免  
其行罰耳不知其議之舛錯也夫為出家之人制服  
但當論其宜不宜不當論其降不降也使其宜耶自  
有本等之服在不得從出後之例也使其不宜耶并  
功服且無之又何止於降等也若謂叔父可降而大  
功將父母可降而期服耶是何進退無據之甚也要  
之出家之人雖可以絕親屬之服而為之親屬者必



不可以絕出家者之服以彼固遊於方外而我初不  
斷夫天倫也故禮官之議謂其調停人情則可謂其  
可為後世法則愚  
未敢以為然也

乾學案僧道不為親屬行服則為之親屬者  
亦當不為僧道行服矣乃黃價於為僧之叔  
父有服則知爾時出家之人死其親屬多為  
之服矣不知其親屬死出家者亦為之服否  
觀陳可所奏則宋時無僧道行服之制可知  
也唐世有之而宋乃去之彼累朝定禮之儒



卷一百十七  
奈何不一議及哉

金史章宗紀明昌三年尚書省奏言事者謂釋道之流  
不拜父母親屬敗害風俗莫此為甚禮官言唐開元二  
年勅云聞道士女冠僧尼不拜二親是為子而忘其生  
傲親而徇於末自今以後並聽拜父母具有喪紀輕重  
及尊屬禮數一準常儀臣等以為宜依典故行之制可  
明律凡僧尼道士女冠并令拜父母祭祀祖先  
本宗親屬在內  
喪服等第  
謂斬衰期功總麻之類  
皆與常人同違者杖一百還俗



異俗禮上

高麗

後漢書高句麗昏姻皆就婦家生子長大然後將還便  
稍營送終之具金銀財帛盡於厚葬積石為封亦種松  
柏

南史其俗已嫁娶便稍作送終之衣死有槨無棺

後周書高麗父母及夫喪其服制同於華夏兄弟則限  
以三月



隋書高麗死者殯于屋內經三年擇吉日而葬居父母及夫喪服皆三年兄弟三月初終哭泣葬則鼓儺作樂以送之埋訖悉取死者生時服翫車馬置於墓側會葬者爭取而去

高麗史禮志國恤篇五服制度斬衰三年給假百日正服子為父女子在室及已嫁而反室者為父義服妻為夫妾為君加服適孫父卒承重者為祖父曾玄孫承重者為曾高祖齊衰三年給假百日正服子為母加服適



孫父卒承重者為祖母曾玄孫承重者為曾高祖母公  
侯以下三日而葬十三月小祥二十五月大祥二十七  
月禫祭齊衰周年給假三十日正服為祖父母為伯叔  
父及妻為姑姊妹在室為姊妹適人無夫子為兄弟為  
長子及妻為衆子及女子為姪及姪女在室為適孫及  
適孫女為適曾孫庶母為其子及君之衆子降服父卒  
母嫁為父後者無服報服亦如之義服嫁繼母為子外族正服  
為外祖父母義服為繼母慈母義母長母為妻大功九



月給假二十日長殤正服為伯叔父及姑為兄弟姊妹  
為子及女子為姪及姪女為適孫成人正服為堂兄弟  
為姊妹在室為衆子妻為庶子及妻為姪妻降服為姑  
姊妹姪女適人外族正服為舅為姨在室小功五月給  
假十五日正服為曾祖父母為伯叔祖父母為從祖姑  
在室為堂伯叔及妻為堂姑在室為兄弟妻為再從兄  
弟為再從姊妹在室為堂姪及堂姪女為適孫妻為姪  
孫及姪孫女在室為適曾孫妻殤正服為伯叔父及姑



之中殤為兄弟姊妹之中殤為子及女子姪及姪女之  
中殤為適孫之中殤為衆孫之長殤為適曾孫之長殤  
降服為堂姊妹適人外族正服為舅妻為外甥及外甥  
女在室義服為妻父母為女壻總麻三月給假七日正  
服為高祖父母為堂伯叔祖父母為再從伯叔及妻為  
再從姑為兄弟妻為親表兄弟及姊妹為再從姪及姪  
女在室為堂姪孫女為曾孫女為衆孫女為曾姪孫為  
適玄孫降服為從祖母及堂姑適人為再從姊妹及姪



孫女適人殤正服為叔父及姑之下殤為堂叔堂姑之  
長殤為兄弟姊妹之下殤為適孫之下殤為衆孫之中  
殤外族降服為姨及外甥女適人正服為堂舅為舅姨  
兄弟及姊妹為外甥妻為外甥義服為庶母乳母凡五  
服聞喪給假三分之二有剩日入假限成宗四年初定  
此制十一年六月制六品以下不入常叅官父母喪百  
日後所司勸令出仕除起復銜以驟服要角遙謝行宮  
十五年七月定朝官遭喪給假式忌假各三日每月朔



望祭假各一日大小祥祭假各七日大祥後經六十日  
行禫祭假五日穆宗六年六月制五品以下官吏父母  
喪百日後所司勸令出仕即上讓表不允遙謝後起復  
結銜以黻服與角出仕顯宗九年五月制文武官遭喪  
第十三月初忌日小祥齋給假三日其月晦日小祥祭  
給假七日第二十五月二忌日大祥齋給假七日其月  
晦日大祥祭給假七日自翼日計六十日至二十七月  
晦日禫祭給假五日二十八月一日以吉服正角出官



行宮十九年四月制京外官吏父母喪大祥齋後禫假  
前依前出仕靖宗三年正月制外任及東西兵馬官吏  
之妻在京身死令坊里報吏部除奏聞并行喪式限行  
移界兵馬使及界負無事時則所管事體酌量許令上  
京以為恒式又官吏及軍其人等有父母墳墓改葬者  
給假三十日來往程途其官遠近叅酌施行六年八月  
制各道起復領軍負當黻服者權著吉服正角還軍歸  
家依制黻服九年六月制罪不及孥前典彛訓誅殺人



等無罪之子禮當行服其三年大喪依制行服其他五服勿令給假文宗三年九月丙申制外方官吏遭兄弟姊妹喪者若在遠州除申請京官直於外官請假妻父母服不論妻之先後並令給假四年正月制外官父母在京身死除奏達許令上京軍興時則所管事體商量兼考兵馬使給假移文酌量裁決其別命貲及隨使記事者亦依此例八年正月制防禦官父母喪百日已滿以吉服正角遙謝赴任二十二年十月制嫁母之喪前



式無服然人子不服其喪似忘劬勞膝下之恩自今行  
百日服後以吉服正角出仕三十年六月制先亡有後  
之妻及同居妻父母服制依式給假三十三年八月制  
外任官大祥祭給假外方立魂堂者許於魂堂在處行  
禮仍留行禫以吉服正角還任九月制奉使入朝官吏  
父母身死迴還後雖已過百日自聞喪日給假百日三  
十五年二月制諸州縣長吏受武散階者小喪依制給  
假以下以導信義葬時給假三十七年十二月制宮城



內各衙門官吏黻服出入不合儀制凶服者不入宮門  
之義宮城外官準資換任其不得已任宮城官者依書  
儀入朝但吉服之文入宮城吉服歸家依制行服宣宗  
二年六月制異國投化官吏父母在本國身死自聞喪  
日依制給假六年十二月制嫁母之服前制只給百日  
假其餘心喪嫁母自有區別其大祥祭外任之子勿許  
上京睿宗五年三月制起復外官異朝使臣迎接者權  
著吉服正角神宗十四年二月制同宗支子及遺棄小



兒三歲前對付收養者為收養父母並服三年喪遺棄小兒仍繼其姓同宗支子為親父母期年異姓族人之子收養者服喪之制禮雖無據恩義俱重不可無服其令服大功九月給假四十九日明宗十四年七月制文武入流以上者妻之父母依親伯叔之妻齊衰周年給假二十日忠烈王三年正月辛卯中贊金方慶持妻母服命權宜後行宰相服制後行古無其例時軍國務繁始有是命七年四月庚午教士卒雖遭父母喪過五十



日即從軍恭愍王四年十二月辛未罷三年丁憂之制  
六年十月辛巳諫官李穡等請行三年喪從之八年十  
二月辛未以兵興除忽赤忠勇三都監五軍三年喪九  
年六月丁亥命百官親喪三年八月丙戌教四方兵興  
軍務方殷其除三年喪制前此雖許行三年喪然百日  
衰經之習如舊但解官不仕而已恭讓王三年五月庚  
子更定服制一遵大明律服制式惟外祖父母妻父母  
服與親伯叔同無後人以三歲前遺棄小兒冒姓附籍



者即同已子其以同宗之子親近為先繼後者亦許行服三年之喪天下之通喪自今許終其制其中關係國家要務必合起復者啓聞取旨奪情起復大小軍官及不許丁憂者止行百日喪其父母喪二十五月內每月行朔望祭至十三月初忌日行小祥祭二十五月第二忌日行大祥祭二十七月晦行禫祭二十八月一日始服吉服喪三年內不許取婦及宴飲四年四月甲戌除軍官三年喪



國恤儀太祖二十六年五月丙午王疾大漸御神德殿  
命學士金岳草遺詔有頃而薨太子諸王及宗室近臣  
皆擗地哀號乃令百官列位於內議省門外宣遺命惠  
宗即位率羣臣舉哀六月戊申發喪于詳政殿宣遺詔  
已酉殯于詳政殿之西階庚午行祖奠太常卿讀謚冊  
攝侍中元甫行禮賓令王仁澤奉太牢之奠壬申葬于  
顯陵以遺命喪葬園陵制度依漢魏故事悉從儉約景  
宗六年七月王疾彌留甲辰遺詔服紀以日易月十三



日周祥二十七日大祥西京安東安南登州等諸道鎮  
守各於任所舉哀三日釋服丙午薨于正寢葬于滎陵  
成宗即位顯宗二十二年五月辛未王疾篤薨于重光  
殿德宗即位居翼室朝夕哀臨甲戌王率羣臣成服百  
姓玄冠素服六月丙申葬于宣陵羣臣公除戊戌王釋  
服十月戊寅宰輔表請復常膳許之元年五月己丑王  
以皇考中祥祭齋七日居翼室諒闇反哭舉哀一如唐  
德宗故事二年八月祔顯宗于太廟文宗三十七年七



月辛酉王疾篤薨于重光殿殯于宣德殿是日順宗即位八月甲申葬文宗于景陵十月乙未王疾篤遺詔在外州鎮官吏止於本處舉哀喪服以日易月薨于喪次是日殯于宣德殿丙申宣宗即位戊戌王率百官成服詣宣德殿行祭十一月庚申王親臨啓殯哭盡哀葬于成陵二年九月壬子王親奠于順宗魂殿九年九月壬午王太后李氏薨于西京歸葬戴陵乙酉遼遣王鼎來賀生辰有司奏古典天子諸侯三年之喪既葬釋服心



喪終制不與士大夫同禮今賀節使已至伏望以日易月二十七日後釋服迎命從之十年九月丁丑王詣仁睿太后返魂殿行小祥祭從晉制奉安神主于本殿肅宗十年十月王還自西京丙寅至長平門外以疾薨于輦中到西華門發喪太子羣臣哭踊奉入延英殿即日移殯于宣德殿遺詔方鎮州牧止於本處舉哀服喪之制以日易月是日睿宗即位甲申葬于英陵元年三月乙卯王詣肅宗虞宮七年七月己巳王太后柳氏薨殯



于大內八月丙申葬于崇陵王祖送于闕庭十七年四月王疾革丙申遺詔喪服以日易月方鎮州牧止於本處舉哀成服三日而除遂薨殯于宣政殿仁宗即位朝夕奠殯哭踊盡哀甲寅葬于裕陵七月己卯虞八月壬寅虞十月癸卯虞十二月朔丙戌虞元年四月癸巳小祥己酉虞十月乙酉虞二年四月甲戌祔于太廟二十四年二月王疾大漸丁卯遺詔喪服以日易月薨于保和殿是日毅宗即位三月甲戌王及百官國人成服甲



申葬于長陵癸巳王以下釋服丙戌虞二年二月丁巳  
大祥明宗三年十月庚申李義旼弑毅宗于雞林五年  
五月丙申發毅宗喪百官玄冠素服三日壬寅葬于禧  
陵十三年十一月癸未王太后任氏薨殯于義昌宮旁  
私第王朝夕哭臨閏月甲寅葬于純陵王導輜車自義  
昌宮步至彌勒寺釋服十四年二月壬戌卒哭禮官奏  
案仁睿太后喪制一依文廟故事卒哭之後上及羣臣  
應帶紅鞋者皆服皂帶今太后之喪亦依此制中書省



駁議王后喪制不宜與國王同王曰人子之於父母其  
心一也豈可重父而輕母哉卒哭之後朕雖許卿等帶  
紅而卿等宜引禮固辭況祥期之內朕常帶皂而卿等  
獨帶紅耶夏四月壬申然燈翼日大會觀樂然燈上元  
事也以國恤權停至是行之唯禁插花諸伎五月甲午  
金祭奠使太府監完顏奩來初至西郊亭接伴使大將  
軍張博仁舞蹈行問上禮奩以國恤舞蹈譏之曰何失  
禮也博仁猶不悟丁巳王宴金使使不入曰今日之事



是謂花宴。況王既起復，禮宜從古。結彩棚，奏樂插花，可也。不則不受享禮。王使人答曰：「雖受起復，練祥未闕，可從吉禮乎？」金使怒，不赴宴。六月戊辰，宴金使，竟不結棚插花。奏樂八月，王以嬖妾死，久不御，內人譏之曰：「丁母后喪未五旬而復常膳，今反乃爾，何失禮之甚也！」十一月甲午，虞已亥，設八闕會，王觀樂于毬庭。以太后祥月除賀禮及舞蹈。工人庭舞歌曲。初禮官奏仲冬，乃王太后忌，曰：「請於孟冬行八闕禮。」王以問相府參知政事文



克謙曰太祖始設八關蓋為神祇也後世嗣王不可以  
他事進退之況太祖禱于神明曰願世世仲冬無令有  
國忌若不幸有忌則疑國祚將艾也故自統合以來仲  
冬無國忌今有之是國之災也而又以孟冬設八關固  
非太祖意禮官所奏不可許從之翼曰大會王又觀樂  
于毬庭十五年八月壬申行八虞祭十六年正月丙午  
祔于太廟神宗五年十一月戊午明宗薨于昌樂宮宰  
樞及常參官以上皂帶詣闕陳慰宗室百官及士庶人



玄冠素服三日唯葬禮都監服至葬日已巳金遣戶部侍郎李仲元來賀生辰十二月朔辛未王受詔於大觀殿先遣左承宣於承慶謂金使曰前王在殯迎詔及宴不敢舉樂金使曰迎天子之命豈可以私喪徹樂乎遂用之丙辰宴金使先遣人告曰前王在殯未敢宴於正殿金使不聽再告乃許之閏月壬寅葬明宗于智陵王初欲葬以王禮崔忠獻堅執不可降從其妃景順王后葬儀間用仁廟葬禮時太子斥在江華未得襄事國人



哀之七年正月己巳王背疽御千齡殿詔太子嗣位是  
為熙宗丁丑薨戊寅殯于靖安宮崔忠獻會宰樞於其  
第議減禮司所奏服喪二十六日為十四日二月庚申  
葬于陽陵二年二月己未祔于太廟康宗二年八月王  
不豫丁丑遺詔易月之服三日而除薨于壽昌宮戊寅  
高宗即位九月丙寅葬于厚陵十九年六月朔庚戌王  
妃王氏薨百官立冠素服三日辛酉葬王后四十六年  
六月壬寅王薨于柳璿第遺詔太子嗣位太子奉使未



還間太孫監國易月之服三日而除太子即位元宗七月乙卯有事于太廟以國恤除牲牢樂懸九月丙辰蒙古使加大只大等來太孫傳令旨曰大朝使來不可以凶服迎當服皂鞋以迎其留使外館以待終制己未葬高宗于洪陵太孫釋服元宗在元聞訃服喪三日而除元年二月己酉然燈太孫如奉恩寺除黃紅傘水精鉞鈇駕前儀仗及引駕其他諸王宰樞兩班士卒侍衛如常儀入康安殿與諸王分坐東西看樂許諸王宰樞文



武兩班服吉服紅鞋三月甲申元宗還戊子即位六月  
丙寅小祥十五年六月王不豫癸亥遺詔易月之服三  
日而除藩鎮州縣毋得越疆奉遵朝廷哀制至於科舉  
昏姻一切如舊薨于堤上宮八月戊辰藩王至自元詣  
堤上宮謁殯殿已巳王幸本闕服黃袍即位於康安殿  
是謂忠烈王九月壬午王詣殯殿始服斬衰麻經率羣  
臣哭已酉葬于韶陵王釋喪服元年十一月乙未王行  
七虞祭于魂殿二年六月乙丑祔于景靈殿七月乙未祔



于太廟二十三年五月壬午安平公主薨于賢聖寺殯于壽寧宮令國中士庶素衣白帽至葬八月丙午世子成服己未葬于高陵三十四年五月王不豫七月己巳薨于神孝寺是夜殯于淑妃金氏第八月壬子潘陽王自元來奔喪詣殯殿入哭設奠百官以玄冠素服侍立甲寅潘陽王服紫袍詣景靈殿告嗣位遂至壽寧宮即位是為忠宣王九月辛卯王祭殯殿癸巳祭殯殿乙未王祭殯殿大斂三臨盡哀百官皆縞素停朝市十月丁



酉葬于慶陵諸司設奠道次祖送梓宮初發王衰麻經  
手擎香爐步至十川橋乃乘肩輿至山陵葬訖率百官  
大臨侍魂輿而返安于靈真殿二年九月丁丑祔于寢  
園攝太尉大寧崔有渰前一日詣靈真殿齋宿其日早  
行告事由祭攝司徒政丞柳清臣典儀判事李之祗與  
諸享官受祝版徑詣寢園百官具儀衛會靈真殿門外  
敘立奉木主出安於輅密直二人坐於前攝上護軍二  
人坐於後內侍常參二人又坐其後百官前後導從至



寢園太尉司徒及典儀判事先入庭分立左右上諸  
尊官及侍臣入庭分立奉主去輅就輿樂作及門樂止  
齋郎奉主置拜位攝侍中俯伏致告訖奉主復乘輿堂  
上執禮官引入正室先見太祖次見惠顯二祖次見仁  
明二祖訖奉安於位堂下樂作太尉洗爵初獻司徒亞  
獻典儀終獻其禮實王之所制也忠肅王二年十一月  
薊國大長公主在元不豫十二月甲午薨庚子柩東還  
仁宗皇帝命中書省御史臺百官奠于道三年二月丙



子公主喪至百官玄冠素服迎于郊殯于永安宮庚寅

葬公主十二年五月辛酉太尉王

即忠宣王

薨于燕邸甲戌

訃至遣三司使戶革傑萬戶姜融迎梓宮于平壤七月

癸酉梓宮至百官玄冠素服郊迎殯于淑妃宮十一月

甲寅葬于德陵十七年六月丁未祔于寢園忠惠王後

五年正月王在元丙子薨于岳陽縣閏二月己巳訃至

停朝市三日六月癸酉梓宮至八月庚申葬于永陵忠

穆王二年正月丁未奉安木主于魂殿五月乙酉祔于



太廟恭愍王元年三月辛亥忠定王遇鴆薨于江華七月癸酉葬于聰陵諸司一員服斬衰奉安神御于宣明殿辛禍元年四月己酉祔于太廟恭愍王十四年二月甲辰徽懿公主薨輟朝三日百官玄冠素服置殯殿國葬造墓都監及山所靈飯法威儀喪帷轎車祭器喪服返魂服翫小造棺槨墓室鋪陳真影等十三色以供喪事又命諸司設奠四月壬辰葬于正陵百官玄冠素服送至陵及返魂改吉服從還王手寫公主真日夜對食



悲泣三年不御肉膳二十三年九月甲申洪倫等弒王  
丙戌殯于寶房辛禍與宰樞發喪舉哀十月庚申葬于  
玄陵百官皆喪服束燭導轎車前行諸司設奠道次拜  
以喪服出演福寺西街迎拜肩輿前導至宣儀門外拜  
送平笠白衣乘馬而還百官至山陵葬訖以吉服返魂  
于寶源庫辛禍元年三月甲戌貞順淑儀公主薨百官  
玄冠素服輟朝市四月甲辰葬于頃陵百官又玄冠素  
服送至山陵公服侍魂輿而返安于魂殿



陳慰儀其日百官並皂鞋閣門先立殿門外東邊祇候  
分引兩班中心為頭異位重行北向立定侍臣隨品交  
立祇候引宰臣就褥位舍人喝宰臣兩班再拜閣使出  
行詣宰臣右立宰臣搢笏跪進表閣使折搢笏奉表抽  
笏奉表入門揖落笏趨進一拜跪搢笏呈表于几上膝  
退面拜趨退出門外揖就位揖云奉宣卿等所慰已知  
舍人喝皆再拜祇候引宰臣出次引兩班出訖閣門橫  
再拜行頭進步復位拜揖退



祔太廟儀其日承宣開殿實魂殿都監判官秉燭先升  
拂匱筵跌几踏殿訖太祝入室啓匱出神主安于跌上  
行告祔廟祭訖太祝入室奉神主還安匱內闔戶而出  
承宣封室戶儀仗樂部列於門外尚舍設褥位於殿庭  
指諭牽龍各著錦衣陪腰輿置褥位上又設褥位於外  
庭置彩帛樓子又設褥位於大門外置大輅於褥位南  
承宣重房備身將軍指諭內侍茶房序立于內紫門階  
下執禮命尚贊閣門祇候引傘扇入陳于外庭侍臣左



右分立宰臣密直一行西上太史局奏時員報某時承  
宣門室戶攝侍中詣匱前跪奏云請降座升輿內侍一  
員奉靈匱一員奉跌几太祝宮闈令奉神主匱降自西  
階安於腰輿殿侍衛及巡檢等陪立次殿中禁服其服  
左右分立指諭牽龍陪立于紫門階上次承宣重房備  
身將軍內侍茶房詣諭肅拜訖殿都知著錦衣奉鈿子  
左右分立陪腰輿出門外小駐舍人喝宰臣密直左右  
侍臣肅拜訖攝侍中跪請降輿升樓子安于樓子如前



儀進行至大路前褥位小駐攝侍中跪請降樓子升輅  
安于輅上如前儀舍人喝百官再拜勅侍奉員將文武  
兩班上馬黃門侍郎奏上馬舍人喝百官再拜訖上將  
軍一員佩刀在輅前立奏神主路上行李萬福升褥太  
廟再拜訖密直二員上將軍二員內侍參上四員參乘  
密直輅外前面上將軍後面別監輅內稍後左右陪奉  
到太廟外駐輅參乘官俱下前到享官肅拜訖輅至門  
外攝侍中跪奏請降輅升輿安于輿上如前儀尚舍於



門外先設幕次幕前設褥位腰輿到褥位上以樓子邀之尚舍別監捲簾安于幕內牀褥上如前儀廟庭執禮俟廟內諸事畢詣幕次舍人喝宰樞侍臣再拜權退引腰輿置幕前褥位上別監又捲簾廟庭太祝奉神主匱安于腰輿齊郎陪腰輿贊者引入廟門廟庭執禮曰魂殿侍衛員將人吏掌固退散出門外再拜退散後齊郎等陪腰輿入安于廟庭東邊褥位太祝齋郎奉木主歷見太祖而下先王先后訖入安于當祔之室享官行祭



禮畢闔戶而出祔景靈殿儀放此

上國使祭奠贈賻弔慰儀文宗之喪宋遣祭奠使左諫  
議大夫楊景畧副使禮賓使王舜封弔慰使右諫議大  
夫錢勰副使西上閤門副使宋球來祭奠使設奠于魂  
殿使副就位執事告陳設畢使副即席再拜使搢笏焚  
香酌酒讀祝文本國上陪官捧祝文俛伏興使副再拜  
訖嗣王向闕立使稱有勅嗣王再拜使口傳宣訖嗣王  
再拜使搢笏捧贈賻詔書嗣王跪受俛伏興祭奠禮畢



弔慰使副少進嗣王向闕立使宣有勅嗣王再拜口宣  
及授弔慰詔書並如祭奠使儀訖與祭奠使副展慰陳  
狀如常儀仁睿太后之喪金遣太府監完顏章來賜祭  
將祭章問曰太后畫像坐耶立耶對曰坐章曰諸侯王  
毋坐而天子使拜可乎必藏影幘乃入行事王遣人陳  
諭再三章從之王立庭下章登堂再拜奠爵安平公主  
之喪元遣和爾郭斯來弔王與世子素服短帽黃帶犀  
臣玄冠素服與和爾郭斯入臨殯殿



先王諱辰真殿酌獻儀其日質明禮司奏初嚴所司陳  
仗衛於殿庭內外如常儀樞密以下左右侍臣就大觀  
殿庭文武百僚就泰定門外立班以俟侍中詣宣仁殿  
門版奏外辦禮司奏二嚴王出御大觀殿鳴鞭內外仗  
衛大喝再拜舍人喝樞密以下左右侍臣再拜次閣門  
員引宰臣就拜位舍人喝宰臣再拜西出黃門侍郎就  
庭中俛伏跪奏請勅駕奏訖俛伏興退復位王降殿升  
輦出利賓門外禮司奏三嚴出泰定門黃門侍郎出就



輦前俛伏跪奏請駐輦俛伏興舍人喝文武百官再拜  
次黃門侍郎復就輦前俛伏跪奏請勅侍臣百僚上馬  
侍中傳宣曰可黃門侍郎俛伏興傳侍臣員將文武兩  
班宣許上馬傳訖舍人喝樞密以下侍臣及近臣百僚  
應騎馬者俱再拜訖黃門侍郎復出俛伏跪奏請勅駕  
俛伏興退復位鳴鞭侍臣前導出昇平門前後導從應  
騎者皆乘馬駕至真殿門外降輦入幄次殿內酌獻並  
與然燈小會駕幸儀同酌獻時宰臣以下文武百僚皆



著皂鞋成宗八年十二月教太祖及王考戴宗王妣宣  
義王后忌日禁屠殺斷肉膳靖宗三年七月壬戌以王  
妣元成太后諱辰百官就乾德殿上表陳慰諱辰陳慰  
始此自後考妣諱辰宰臣進表三品以上黑帶假紅以  
下犀帶陳慰如儀文宗三十一年五月甲戌王以顯考  
忌服素襴避正殿令中外斷音樂禁弋獵終月恭讓王  
三年正月辛丑禮曹啓曰安慶公渥以元王母弟纂立  
元朝遣使奉元王復位則渥不當稱為英宗亦不當載



諸祀典今遇忌日致祭有乖大義請罷之且忠肅王妃洪氏乃忠惠王恭愍之母后忠惠王妃尹氏乃忠定王之母后以正統君王有後之妃迄今不祀實為闕典乞兩妃忌日及真殿祭享悉倣近代先后禮從之

上國喪顯宗二十二年七月己未契丹報哀使工部郎中南承顏來告聖宗喪宣詔于顯宗魂堂辛酉德宗引契丹使舉哀于內殿十月辛巳遣工部郎中柳喬如契丹會葬文宗九年九月癸亥契丹哀告使鴻臚少卿張



嗣復來告興宗喪王聞嗣復過鴨綠江減常膳徹音樂  
禁屠宰斷弋獵禮司奏禮世子不為天子服又童子不  
總乞太子及樂浪開城國原侯並不服平壤公以下丈  
武常叅以上服喪從之乙丑王服素襴率百官出昌德  
門前嗣復傳詔舉哀行服輟朝市三日丙子遣知中樞  
院事崔惟善工部侍郎李得路如契丹弔喪會葬仁宗  
十三年二月辛丑金報哀使檢校右散騎常侍王政來  
告太祖喪百官玄冠素服癸卯王受詔與國人服喪三



日閏月丁未報哀使還附表陳慰乙卯遣少卿金端侍  
御史李時敏如金弔喪十四年二月丙辰金遣使來告  
太皇太后喪舉國素服三日丁卯遣殿中監尹彥植左  
司諫崔允儀如金弔祭明宗十九年正月金世宗崩三  
月戊午遣奉慰使及祭奠會葬使如金己未金遣使  
來告喪庚申王素服率百官迎詔於都省廳舉哀四月  
壬戌釋服二十一年二月乙未金遣完顏臣來告皇太  
后喪遣大將軍韓正修郎中崔敦禮如金弔喪大將軍



文得呂司業李世長致祭丁酉王率羣臣發喪于都省  
熙宗四年冬金章宗崩五年正月丁酉遣奉慰使史洪  
紀祭奠使李淳中如金忠烈王二十年正月癸酉世祖  
皇帝崩王與公主以羊十馬一祭于殯殿二十六年正  
月丙寅元皇太后崩四月庚戌遣同知密直司事薛景  
成如元弔喪戊午王如元弔喪六月癸酉王祭太后殯  
殿恭讓王四年六月己卯王聞大明皇太子薨欲發喪  
廷臣啓曰皇太子未成為君不可服喪於是輟朝三日



百官布帶

鄰國喪太祖七年九月新羅王昇英薨來告喪王舉哀遣使弔之

諸臣喪高麗大臣之卒賻贈恩恤極為優厚然其儀制史闕未詳畧舉其見於史者以著其凡太祖十九年十二月大匡裴玄慶疾篤王親幸其第問疾王出門而玄慶卒王駐駕命官庀葬事而後還成宗六年二月內史令崔知夢卒王聞訃震悼賻千匹米三百石麥二百石



茶二百斤香二百斤官庀葬事贈太子太傅謚敏休八  
年五月守侍中崔承老卒王慟悼下教褒其勲德贈太  
師賻布千疋麵三百石粳米五百石乳香百斤腦原茶  
二百斤大茶十斤十四年四月平章事崔亮卒王慟悼  
贈太子太師賻米三百石麥二百石腦原茶千斤以禮  
葬之謚匡彬穆宗元年七月內史令徐熙卒賻布千匹  
薺麥三百石米五百石腦原茶二百斤大茶十斤梅香  
三百兩謚章威以禮葬之七年六月侍中韓彥恭卒賻



米五百石麴麥三百石平布八百疋中布四百匹茶二百斤贈內史令謚貞信以禮葬之顯宗八年五月戶部尚書金殷傳卒輟朝一日後贈侍中十五年六月平章事崔沆卒王悼甚賻絹三百匹布五百段米麥千石謚節義二十二年八月侍中姜邯贊卒輟朝三日謚仁憲命文武兩班會葬弔誄賻贈加禮靖宗八年六月內史令徐納卒王御重光殿廊下舉哀貴臣舉哀與諸王同其異者一舉哀而止耳文宗元年十月平章事皇甫穎



卒賜米百石麥五十石布四百匹大茶三百斤香十斤  
肅宗九年九月參知政事朴寅亮卒賜弔慰教及誄書  
賻贈以禮謚文烈睿宗五年七月平章事李頴卒輟朝  
三日遣使弔祭庀葬事謚文良十年二月中書令崔思  
諤卒王震悼輟朝三日賻恤優厚令百官會葬謚忠景  
仁宗十四年十一月樞密院知奏事鄭沆卒王悼甚輟  
朝弔祭賻米百石布二百匹御筆持謚文安毅宗十一  
年二月平章事高兆基卒輟朝三日命有司護喪賜謚



明宗十六年四月政堂文學崔汝諧卒官庀葬事輟朝三日謚文貞十九年九月平章事文克謙卒輟朝三日謚忠肅高宗四年三月樞密副使蔡靖卒官庀葬事以賞平賊之功六年八月崔忠獻死十二月丙子以忠獻死輟朝三日元宗四年十一月永安公僖卒五年四月辛未以僖卒輟朝三日十四年九月平章事張佖卒十一月庚子以佖卒輟朝三日恭愍王十七年密直副使李岡卒王悼甚賜厚賻樞密例不得謚特謚文敬



百官忌假景宗六年十二月制父母忌日依書儀一日  
兩宵給假成宗元年十二月制百官遇父母忌假一日  
兩宵祖父母忌無親子則亦依父母例顯宗十一年閏  
六月制無親子祖父母忌日除庶人外文武入仕人並  
給假一日兩宵文宗三十年六月制先亡有後之妻及  
同居妻父母忌日依制給假明宗十四年七月制文武  
入流以上者妻父母忌日依外祖父母式一日兩宵給  
假恭讓王三年五月庚子敕近設家廟既令六品以上



祭三代自今許行曾祖考妣忌日之祭

乾學案自漢以來禮家有喪服君臣圖喪服  
天子諸侯圖皆專言國恤者也自許敬宗李  
義甫以曲學阿世隱諱而刪去之後遂相沿  
不講儒者深有憾焉乃鄭仁趾作高麗史於  
禮志大書國恤於篇所謂禮失而求之野矣

滅

後漢書滅北與高句麗沃沮南與辰韓接其人愚慙多



所忌諱疾病死亡輒捐棄舊宅更造新屋

百濟

後周書百濟父母及夫死者三年治服餘親則葬訖除之

隋書百濟喪制如高麗

馬韓

晉書馬韓不知乘牛馬畜者但以送葬

辰韓



寰宇記辰韓以大鳥羽送死其意欲使死者神魂飛揚也

新羅

隋書新羅人死有棺斂葬起墳陵王及父母妻子喪持

服一年

讀禮通考卷一百十七



欽定四庫全書

經部

讀禮通考卷二百二十八至

詳校官監察御史臣劉涓

給事中臣溫常校覆勘

總校官編修

臣

王燕緒

校對官主事

臣

陳文彬

謄錄監生

臣

許思光



欽定四庫全書

請禮通考卷一百十八

刑部尚書徐乾學撰

異俗禮下

倭

後漢書倭人死停喪十餘日家人哭泣不進酒食而等類就歌舞為樂

晉書倭人死有棺無槨封土為冢初喪哭泣不食肉已葬舉家入水澡浴自潔以除不祥



隋書倭國死者斂以棺槨親賓就尸歌舞妻子兄弟以白布製服貴人三年殯於外庶人卜日而瘞及葬置尸船上陸地牽之或以小輿

日本考喪事舉家悲泣不飲酒食肉以白布置衣裹頭不拘富貴俱置龕子令亡人合掌坐于龕內外縫以紙餉之上書大乘妙法蓮華經七字過龕封貼却將白布盤繞於龕上用絹段為彩親友聞喪詣龕而弔次選日殯出預於墳所編一竹城外以白布絹段帳結于城分



其東西南北四門倩八人頭蓋衣甲手執鎗刀扮為門神分守四門俟其殯出用扛擡龕皆用白布裏扛使孝子親擡如止生一子女壻外甥代之至親皆扶殯而行殯前排紙旛二三十竿旛上書大乘妙法蓮華經七字外設香亭一座名曰設孤臺令一人在前撒銅錢而行名曰買路錢撒地之錢任其貧乞者拾之富貴之家令一義男為從殯將亡人平昔所好而食之類置一圓食籬令從葬者頂首而行殯至墳所按吉方擇門而進擡



繞三面正中安下俟親友送殯者至喪家預買草履千餘雙待親友至墳所請却自履皆穿喪家草履入竹城詣龕合掌鞠躬參謁畢客出仍穿自履喪家草履復却原所親友事畢請僧唱經俱以禮物酬謝訖再有乞丐至厚薄賞之俱完次將竹城周圍架起乾柴門神孝子各執長竿以火焚之柴盡復添白衣草履之物盡毀於內務燒三日三夜以為至孝另將灰骨和泥送在寺中按於神腹前從葬者令入寺內燒香奉佛永不令歸貧



者無力可焚亦於竹城內埋之畢挈家人水澡滌以祓  
不祥色衣而歸以取吉利

夫餘

後漢書夫餘國人死有槨無棺殺人殉葬多者以百數  
其王葬用玉匣漢朝常豫以玉匣付玄菟郡王死則迎  
取以葬焉

晉書夫餘死者以生人殉葬有槨無棺其居喪男女皆  
衣純白婦人著布面衣去玉珮



東沃沮

後漢書東沃沮在高句麗蓋馬大山之東北與挹婁夫  
餘南與濊貊接其葬作大木槨長十餘丈開一頭為戶  
新死者先假埋之令皮肉盡乃取骨置槨中家人皆共  
一槨刻木如主隨死者為數焉

寰宇記又有瓦鐙置米於中徧懸之於槨戶邊

挹婁

晉書肅慎氏一名挹婁死者其日即葬之于野交木作



小樽殺豬積其上以為死者之糧父母死男子不哭泣哭者謂之不壯

韎韠

北史勿吉亦謂之韎韠其國父母春夏死立埋之冢上作屋不令雨濕若秋冬死以其尸哺貂貂食其肉多得之

舊唐書韎韠蓋肅慎之地死者穿地理之以身觀土無棺斂之具殺所乘馬於尸前設祭



扶桑

南史扶桑國親喪七日不食祖父母喪五日不食兄弟  
伯叔姑姊妹喪三日不食設座為神像朝夕拜奠不制  
喪經嗣王立三年不親國事

女國

隋書女國在蔥嶺之南其國代以女為王人死剝取皮  
以金屑和骨肉置於壺內而埋之經一年又以其皮內  
於鐵器埋之



流求

隋書流求國死者氣將絕舉至庭前親賓哭泣相弔浴其尸以布帛纏之裹以葦席襯土而殯上不起墳子為父者數月不食肉其南境風俗少異人有死者邑里共食之子為親喪數月不肉食亦其俗之可嘉死者以中元前後日溪水浴其尸去其腐肉收其骸骨以布帛纏之裹以葦草襯土而殯上不起墳若王及陪臣之家則以骸匣藏於山穴中仍以木板為小牖戶歲時祭掃則



啓鑰視之蓋恐木朽而骨暴露也

苗

炎微紀聞苗俗喪無服或葬或不葬在金坑有克孟牯  
羊二族親死不哭笑舞浩唱謂之閭尸明年聞杜鵑聲  
則比屋號泣曰鳥猶歲至親不復矣在平樂為紫藍苗  
夫死其妻嫁而後葬曰喪有主矣在牂牁之間為八番  
子葬不擇日以夜靜出之云不忍使其親之知也在陳  
蒙爛土為天苗人死不葬以藤蔓束之樹間而已



黎尙

桂海虞衡志黎人親死不哭不粥飯惟食生牛肉以為  
哀痛之至葬則舁櫬而行令一人前行以雞子擲地雞  
子不破處即為吉穴

炎徼紀聞峒人死以尺帛裹頭為服

狔狔

炎徼紀聞狔狔種有五以布一幅橫圍腰間花者為花  
狔狔紅者為紅狔狔殮死有棺而不葬置之厓穴間高



者絕地千尺或臨大河不施蔽蓋以木主若圭羅樹其側號曰家親殿在平伐者為打牙狔狔父母死則子婦各折其二齒投之棺中云以贈永訣也在新添者為翦頭狔狔人死則積薪焚之

狔狔

炎徽紀聞狔狔俗與狔狔畧同死則男女羣冢俛尸而瘞之云為死者避厭也

狔狔



炎徽紀聞狎獷一曰楊黃父母死則焚其衣服殉以牛馬云若贈鬼者然

仲家蠻

炎徽紀聞其俗喪食尚魚鰕而禁禽獸之肉葬以繖蓋墓期年發而火之祭以枯魚

宋家蠻

炎徽紀聞其俗喪葬飯蔬飲水二十一日封而識之若馬鬣者



蔡家蠻

炎徼紀聞其俗人死不哭遶尸而歌謂之唱齊

龍家蠻

炎徼紀聞徙符驪氏之裔人死以杵擊椎塘和歌哭椎塘者曰也舁之幽巖秘而無識以七月七日祭其先塋

西原蠻

桂海虞志蠻俗親始死披髮持餅甕慟哭水濱擲銅錢紙錢於水汲歸浴尸謂之買水否則鄰里以為不孝



羅羅

炎徼紀聞羅羅亦曰烏蠻白蠻人死以牛馬革裹而焚之

松外諸蠻

寰宇記其地有數十百部落無大君長有數十姓各擅山川不相役屬莊蹻之餘種也死喪哭泣棺槨襲斂無不畢備一年之內穿地為坎殯于舍側止則小屋三年而後出葬之蟲蚌封棺令其耐濕父母死皆斬衰布衣



遠者至四五年近者二三年然後即吉其被人殺者喪主以麻結髮而黑其面衣裳不緝

夜郎

新唐書自夜郎滇池以西皆莊蹻之裔死則殯舍之左三年乃葬以蠡蚌封棺父母喪斬衰布衣不澡遠者四五年近者二三年為人所殺者子以麻括髮墨而衣不緝

附國



隋書附國蜀郡西北二千餘里死者無服制置尸高牀之上沐浴衣服被以牟甲覆以獸皮子孫不哭帶甲舞劍而呼云我父為鬼所取我欲報冤殺鬼自餘親戚哭三聲而止婦人哭必以兩手掩面死家殺牛親屬以豬酒相遺共飲噉而瘞之死後一年而大葬其葬必集親賓殺馬動至數十匹立木為祖父神而祀之

炎人國

墨子楚之南有炎人國者其親戚死朽其肉而棄之然



後埋其骨乃成為孝子

哥羅

寰宇記哥羅在槃槃東南其俗死則焚尸盛以金甕沈之大海

林邑

晉書林邑國居喪剪鬚謂之孝燔尸中野以為葬

南史林邑國死者焚之中野謂之火葬其寡婦孤居散

髮至老



隋書林邑王死七日而葬有官者三日庶人一日皆以  
函盛尸鼓舞導從輿至水次積薪焚之收其餘骨王則  
內金甕中沈之於海有官者以銅甕沈之於海口庶人  
以瓦送之於江男女皆截髮隨喪至水次盡哀而止歸  
則不哭每七日然香散花復哭盡哀而止盡七七而罷  
至百日三年亦如之

舊唐書林邑人信佛法多出家父母死子則剔髮而哭  
以棺盛尸積柴燔柩收其灰藏於金甕送之水中



扶南

晉書扶南喪畧同林邑

南史扶南國俗居喪則剃除須髮死者有四葬水葬則投之江流火葬則焚於灰燼土葬則瘞埋之鳥葬則棄之中野

頻遜

寰宇記其俗多鳥葬將死親賓歌舞送於郭外有鳥如鷺口如鸚鵡而紅色飛來萬計家人避之鳥食肉盡乃



去燒其骨沈海中以為上行人也必生天鳥若回翔不食其人乃自悲復以已為有穢乃更就火葬以為次行也若不能生入火又不被食者以為下行也

### 赤土

隋書赤土國扶南之別種也死則剔髮素服就水上構竹木為棚棚內積薪以尸置上燒香建幡吹蠡擊鼓以送之縱火焚薪遂落於水貴賤皆同惟國王燒訖收灰貯以金瓶藏於廟屋



真臘

隋書真臘在林邑西南本扶南之屬國也其喪葬男女皆七日不食剔髮而哭僧尼道士親故皆來聚會音樂送之以五香木燒尸收灰以金銀瓶盛送於大水之內貧者或用瓦而以五彩色畫之亦有不焚送尸山中任野獸食者

周達觀真臘風土記人死無棺止以簟席之類蓋之以布其出喪也前亦用旂幟鼓樂之屬又以肉拌炒米繞



路拋撒擡至城外僻遠無人之地棄擲而去俟有鷹犬  
畜類來食頃刻而盡則謂父母有福故獲此報若不食  
或食而不盡反謂父母有罪而至此亦有焚者唐人之  
遺種也父母死別無服制男子則髡其髮女子則於顙  
門翦髮似錢大以此為孝國王仍有塔葬埋但不知葬  
身與葬骨耳

投和

新唐書投和在真臘南親喪斷髮為孝焚尸斂灰於罌



沈之水

寰宇記其俗死喪則初祀哭泣若父母之喪則以截髮為孝

多摩長

文獻通考多摩長國居于海島北與訶陵等國接死亡無喪服之制以火焚其尸

暹羅

續文獻通考暹羅在占城極南本暹與羅斛二國地元



至正間合為一人死則灌水銀以養其身

賓童龍

續文獻通考國與占城地相接喪事能持孝服設佛以度死者

三佛齋

馬歡瀛涯勝覽舊港即三佛齋也死喪祔與瓜哇相同

勃泥

宋史勃泥國在西南大海中喪葬亦有棺斂以竹為輿



載棄山中二月始耕則祀之凡七年則不復祀矣

寰宇記其俗喪有棺殮孩孺則燎之成人則以竹為棚載之棄山中

瓜哇

費信星槎勝覽其喪事凡主翁病死婢妾輩相對而誓曰死則同往臨殯之日妻妾奴婢皆滿頭簪草花披五色手巾隨尸至海邊或野地昇尸于沙地俾衆犬食盡為孝如食不盡則悲歌號泣堆柴于旁衆婦坐其上良



久乃縱火燒柴而死蓋殉葬之禮也

續文獻通考爪哇即古闍婆國喪有水葬火葬土葬唯死者所欲

麻逸凍

續文獻通考地在交欄山之西南洋國尚節義婦人喪夫則削髮髻面絕食七日多有並逝者得甦亦不再嫁至焚夫日多自赴火死

錫蘭



續文獻通考國人鬚須并滿身毫毛皆剃去淨止留其髮用白布纏頭如有父母死亡者其毫毛即不剃去以此為孝人死則火化埋骨其喪家娶親鄰之婦都將兩手齊拍胃乳而叫嚎哭泣為禮

滿刺加

張昇瀛涯勝覽喪類瓜哇

啞魯國

張氏瀛涯勝覽喪禮與瓜哇滿刺加同



蘇門荅刺

張氏瀛涯勝覽婚喪服用與滿刺加國同

耨陀洹

新唐書陀洹一曰耨陀洹在環王西南海中親喪在室不食燔尸已則剔髮浴於池然後食

墮婆登國

舊唐書墮婆登國死者口實以金又以金釧貫於四肢然後加以婆律膏及龍腦等香積薪以燔之



義渠

墨子秦之西有義渠

或作儀秉

三國者其親戚死聚柴薪而

焚之燠上謂之登遐

劉勰新論作昇遐

孝養國

拾遺記冀州之西二萬里有孝養之國其俗人年三百歲死葬之中野百鳥銜土為墳羣獸為之掘穴不封不樹有親死者刻木為影事之如生昔黃帝伐蚩尤除諸凶害獨表此處為孝養之鄉



高昌

師即車

後周書高昌喪葬與華夏小異而大同

焉者

後周書焉者死亡者皆焚而後葬其服制滿七日則除之

龜茲

後周書龜茲喪葬與焉者畧同

康居



韋節西蕃記國城外別有二百餘戶專知喪事別築一院院內養狗每有人死即往取尸置此院內飼狗食之肉盡收骸骨埋殯無棺槨

滑

南史滑國葬以木為椁父母死其子截一耳葬訖即吉  
噉噉國

寰宇記噉噉高車之別種或云大月氏之種類死者富家累石為藏貧者掘地而埋隨身諸物皆置冢內



天竺

舊唐書天竺即漢之身毒死者或焚尸取灰以為浮圖  
或委之中野以施禽獸或流之於河以飼魚鱉無喪紀  
之文

党項

隋書党項三苗之後也人年八十以上死者以為令終  
親戚不哭少而死者則云天枉共悲哭之

舊唐書党項人死則焚之名為火葬



哈烈

續文獻通考在肅州之西萬餘里即漢之大宛也其俗  
衣尚白有喪易以青

吐蕃

舊唐書吐蕃重兵死惡病終累代戰沒以為甲門居父  
母喪截髮青黛塗面衣服皆黑既葬即吉其贊普死以  
人殉葬衣服珍翫及所賞乘馬弓劍之類皆悉埋之仍  
於墓上起大室立土堆插雜木為祠祭之所



新唐書吐蕃為冢墜塗之其君臣自為友五六人曰共  
命君死皆自殺以殉所服翫乘馬皆瘞起大屋冢顛樹  
衆木為祠所

犬羊同國

寰宇記國東接吐蕃北直于闐其君長死抉去其腦實  
以珠玉剖其五臟易以黃金假造金鼻銀齒以人為殉  
卜以吉辰藏諸巖穴他人莫知其所多殺牂牛草馬以  
充祭祀葬畢服除



悉立

寰宇記國在吐蕃西南死於中野不為封樹喪制以黑  
為衣一年就吉

波斯

後周書波斯國死者多棄尸於山一月著服城外有人  
別居惟知喪葬之事號為不淨人若入城市搖鈴自別  
隋書波斯人死者棄尸於山持服一月

渴槃陀



寰宇記其俗死者埋殯七日為孝

東女國

舊唐書東女國西羌之別種以西海中復有女國故稱東女焉俗以女為王王若死國中多斂金錢動至數萬更於王族求令女二人而立之大者為王其次為小王大王死即小王嗣立或姑死而婦繼其居喪服飾不改為父母則三年不櫛沐貴人死者或剥其皮而藏之內骨於瓶中揉以金屑而埋之國王將葬其大臣親屬殉



死者數十人

刳國

文獻通考國在葱嶺中死亡棄於山

大食

杜環經行記大食國在波斯之西葬惟從儉

吐谷渾

晉書吐谷渾喪有服制葬訖而除

後周書吐谷渾死者亦皆埋殯其服制葬訖則除之



射姑

劉勰新論北方有射姑之國其親死則棄尸于江中謂之水仙

烏桓

後漢書烏桓人死斂尸以棺有哭泣之哀至葬則歌舞相送肥養一犬以彩繩纓牽并取死者所乘馬衣物皆燒而送之言以屬累犬使護死者神靈歸赤山赤山在遼東西北數千里如中國人死者魂神歸岱山也



高車

北史其俗死亡葬送掘地作坎坐尸於中張臂引弓佩刀挾稍無異於生而露坎不掩走馬遶旋多者數百匝男女無大小皆集會之

步落稽

後周書步落稽死亡殯葬與中夏畧同

突厥

後周書突厥死者停尸於帳子孫及諸親屬男女各殺



羊馬陳於帳前祭之遶帳走馬七匝一詣帳門以刀斨  
而且哭血淚俱流如此者七度乃止擇日取亡者所乘  
馬及經服用之物并尸俱焚之收其餘灰待時而葬春  
夏死者候草木黃落秋冬死者候華葉榮茂然後坎而  
瘞之葬之日親屬設祭及走馬斨面如初死之儀葬訖  
於墓所立石建標其石多少依平生所殺人數又以祭  
之羊馬頭盡懸挂於標上是日也男女咸盛服飾會於  
葬所男有悅愛於女者歸即遣人聘問其父母多不違



也

隋書突厥有死者停尸帳中家人親屬多殺羊馬而祭之遶帳號呼以刀劃面血淚交下七度而止於是擇日置尸馬上而焚之取灰而葬表木為塋立屋其中圖畫死者形儀及其生時所經戰陣之狀常殺一人則立一石有至千百者

鐵勒

隋書鐵勒俗與突厥同惟死者埋殯之此其異也



都波

寰宇記都波鐵勒之別種也死亡以木櫃盛尸置山中或懸於樹上送葬哭泣與突厥相類

新唐書都播亦曰都波人死以木櫃斂置山中或系於樹

庫莫奚

後周書庫莫奚死者則以葦薄裹尸懸之樹上

契丹



北史契丹國在庫莫奚東異種同類父母死而悲哭者  
以爲不壯但以其尸置於山樹之上經三年乃收其骨  
而焚之因酌酒而祝曰冬月時向陽食若我射獵時使  
我多得睹鹿其無禮頑嚚最甚

室韋

北史室韋國在勿吉北千里父母死男女衆哭三年尸  
則置於林樹之上

新唐書室韋契丹別種蓋丁零苗裔也每部共構大棚



死者置尸其上喪期三年

流鬼

寰宇記流鬼在北海之北死鮮封樹哭之三年無餘服制

點戛斯

新唐書點戛斯古堅昆國也喪不勢面三環尸哭乃火之收其骨歲而乃墓然後哭泣有節

寰宇記點戛斯人死惟哭三聲



讀禮通考卷一百十八